



Pareser ba Komisaun B Parlamentu Nasional Kona-bá Proposta Orsamentu Jeral Estadu 2015 Ba Seitor Siguransa

Mahein Nia Lian Nú. 90, 06 Novembru 2014



**Relatoriu Fundasaun Mahein Nia Lian ne'e suporta husi povu Amerikanu liu husi
Ajénsia Estadus Unidus ba Dezenvolvimentu Internasional (USAID) no Embaxada
Finlandia iha Jakarta.**

**Vizaun husi autor sira ne'ebé expresa iha publikasaun relatoriu sira ne'e la
reprezenta vizaun husi Ajénsia Estadus Unidus ba Dezenvolvimentu Internasional
(USAID) no Embaxada Finlandia.**



Website: www.fundasaunmahein.org



Kontiudu sira

Kontiudu sira	2
Introdusaun	3
Metodolojia	3
OJE ba Ministériu Defeza no Siguransa (MDS)	4
1. Defeza no FALINTIL-FDTL	5
2. Siguransa Interna no PNTL	7
Servisu Nasional Intelijensia	16
Rekomendasaun	19
Bibliografia	20



Introdusaun

Governu apresenta ona proposta Orsamentu Jeral Estadu (OJE) tinan 2015 ba Parlamentu Nasional iha fulan Outobru tinan 2014. Iha ne'ebé dadaun ne'e iha ona faze audensia iha komisaun parlamentar sira. Partikularmente ba seitor siguransa nian, tuir ajenda audensia ho Komisaun B Parlamentu Nasional hahu loron 04 to'o 10 Novembru tinan 2014.¹

Nune'e mos Komisaun B Parlamentu Nasional husu Fundasaun Mahein (FM) hato'o pareser ruma kona-bá Proposta Lei Nú. 16/III (3^a) OJE 2015. Iha ne'ebé bele fo opiniaun ruma kona-bá proposta OJE 2015 ba seitor siguransa nian.² Ho nune'e objetivu husi relatoriu ida ne'e nu'udar pareser ida ba Komisaun B Parlamentu Nasional.

Pontu prinsipal husi relatoriu ida ne'e sei hare ba alokasaun sira ne'ebé aloka ba instituisaun siguransa. Hanesan Ministériu Defeza no Siguransa (MDS) ne'ebé ezejuta husi Sekretaria Estadu Defeza no Siguransa, Institutu Defeza Nasional (IDN), FALINTIL-Força Defesa Timor-Leste (FALINTIL-FDTL), Polisia Nasional Timor-Leste (PNTL), Servisu Nasional Intelijensia (SNI) no Komisaun B Parlamentu Nasional.

Iha ambitu ida ne'e, análiza prinsipal sira ba planu asaun anual no alokasaun orsamentu ba nesesidade seitor siguransa nian. Iha ne'ebé durante ne'e sai preokupasaun sosiedade tomak nian no Parlamentu Nasional rasik. Nune'e bele eleva kapasidade instituisaun siguransa nian liu-liu kondisaun bázika sira hanesan lejislasaun, infra-estrutura, ekipamentu no atividade prinsipal sira ne'ebé sei realiza iha tinan 2015.

Metodolojia

Relatoriu ne'e nia ambitu análiza ba Proposta OJE 2015 ba seitor siguransa nian. Iha ne'ebé hare ba planu asaun anual no alokasaun sira ba MDS, Komisaun B Parlamentu Nasional no SNI. Nune'e mos relatoriu monitorizasaun FM nian ba dezenvolvimentu instituisaun siguransa nian.

Análiza sira nia baze ba metodu ne'ebé FM adopta hanesan *Security Sector Discussion* (SSD). Partikularmente kestaun sira defeza no siguransa nasional liu-liu area esensial sira hanesan siguransa iha fronteira terestre, maritima, kontrolu migratoriu, siguransa komunitariu no intelijensia.

¹ Parlamentu Nasional Komisaun B - Negosiu Estranjeiru, Defeza no Siguransa Nasional. Kalendaru audensia debate kona-bá proposta Lei Orsamentu Jeral Estadu ba tinan 2015.


² Konvite husi Komisaun B Parlamentu Nasional husu Fundasaun Mahein (FM) fo nia parser ba proposta OJE 2015 ba seitor siguransa Timor-Leste nian. Konvite ne'e hasai iha loron 27 Outobru 2014.

Ho ida ne'e relatoriu ne'e sei fokus deit ba area esensial sira temi iha leten. Iha ne'ebé durante ne'e FM nia monitorizasaun hare katak sai hanesan pontu fraku no lakunas iha ambiente siguransa interna no esterna nian.

OJE ba Ministériu Defeza no Siguransa (MDS)

Proposta OJE 2015 ba MDS hamutuk tokon US\$ 71,348 husi total OJE tomak US\$ 1.5 Biloens ne'ebé administra husi MDS la inklui Fundu Espesial no parseiru dezvoltimentu sira. Total orsamentu ne'ebé aloka tuir rubrika despeza sira hanesan iha kraik ne'e.


Grafika despeza sira tuir kategoria orsamentu ba MDS (\$'000)



Fontes: Livru 4A Proposta OJE 2015

Nune'e mos alokasaun ba instituisaun sira iha MDS hanesan Gabinete MDS, Sekretaria Estadu Defeza (SED), FALINTIL-FDTL, IDN, Sekretaria Estadu Siguransa (SES) no PNTL maka hanesan tuir mai ne'e.

Grafika alokasaun ba intituisaun sira iha MDS (\$'000)



Fontes: Livru 4A Proposta OJE 2015

Hanesan introdus tiha ona iha leten katak relatoriu ne'e sei deskreve espesifikamente ba area esensial sira hanesan fronteira terrestre, maritima, kontrolu migratoriu no siguransa



komunitariu nian. FM nia hare area esensial sira ne'e sei menus rekursu ema, facilidade no ekipamentu. Nune'e mos kooperasaun no koordinasaun sira entre instituisaun siguransa sira. Lakunas hirak ne'e fo espasu ba atividade ilegal sira, trafiku ba droga, kilat, trafiku umanu, falsifikasaun dokumentu no potencia ameasa sira hanesan terorismu global ne'ebé dadaun ne'e movimentu maka'as iha rejiaun.

1. Defeza no FALINTIL-FDTL

Iha seitor defeza no FALINTIL-FDTL nian, iha tinan 2015 sei kria modelu no lejislasaun ba Sistema Autoridade Maritima Timor-Leste nian no lejislasaun sira seluk area defeza nian.³ FM rekomenda tiha ona iha relatoriu sira dahuluk kona-bá kriaun Sistema Autoridade Maritima ne'ebé koordena insituisaun sira hanesan Komponente Naval FALINTIL-FDTL, UPM, Alfandega, Karantina, Portu no Dirasaun Nasional Peska nian. Nu'udar Sentru Nasional Siguransa Maritima nian ho ninia responsabilidade tuir ida-idak nia serbisu inklui lejislasaun ba Autoridade Nasional Maritima nian atu fortifika sira nia serbisu.

Portantu FM nia monitorizasaun durante ne'e iha nivel koordinasaun seidak hatur iha autoridade ida nian responsabilidade. Iha ne'ebé sei iha deit koordinasaun sira bazeia ba kontaktu informal sira wainhira iha asidenti no insidenti ruma iha tasi.

Asuntu Sistema Autoridade Maritima hetan mos preokupasaun husi ofisial superior FALINTIL-FDTL no PNTL. Brigadeiru Jeneral Filomeno Paixão hato'o katak durante ne'e laiha kordenasaun no sistema ida ne'ebé maka metin. Nune'e implika mos ba kontolu sira husi FALINTIL-FDTL, PNTL, Alfandega, no Ministériu Transporte no Komunikaun (MTK), nia kontrolu maka ba iha parte norte deit, maibe ba iha parte sul nian laiha kontrolu.

Nune'e mos Komandante Unidade Polisia Maritima (UPM), Superintendenti Polisia Lino Saldanha realsa, natureza ba estrutura ida ne'e diak tebes, tanba nia ambitu ne'e hare liu ba iha serbisu integradu. Tanba ne'e se estabelese direktor jeral autoridade maritima ne'e kestaun ba liu iha politika atu halo lejislasaun oinsa atu produs lei hotu para reforsa autoridadae maritima nian.

Ho nune'e bele organiza ministériu no instituisaun ne'ebé relevante atu hamutuk forma Sistema Autoridade Maritima ida bele kontrola ita nia tasi komesa husi ponte kais, sasan sira tama sai, ro ki'ik ro bo'ot, ro militar, sivil no plataforma kontinental hodi sai to'o zona ekonomia eksklusivu. Autoridade maritima maka Estado Timor-Leste nia soberania iha tasi, Estado hare, manda deit iha rai maran, maibe lalehan no tasi seidak los, tan nee Estado tenke iha nia prezensa, liu husi sistema ida. Durante ne'e FALINTIL-FDTL, PNTL, Alfandega no Ministériu Transporte no Komunikaun (MTK), tau matan maka'as

³ Livru 2 ,OJE 2015. Planu Asaun Anual ba FALINTIL-FDTL. Pajina 129



ba iha parte norte deit, maibe ba iha parte sul nian kuaze ladun.⁴

Iha seitor defeza nian sei apoiu ba atividade sira hanesan dezenvolve relasaun entre instituisaun sira hanesan dezenvolve jestaun siguransa fronteira. Iha ne'ebé estabelese kooperasaun interna entre FALINTIL-FDTL no PNTL iha area siguransa nian.⁵ Planu atividade ne'ebé preve iha tinan 2015 nian partikularmente kona-bá jestaun siguransa fronteira nian. FM sujere presiza halo ona avaliasaun konjunta saida maka sai hanesan ameasa iha fronteira. Nune'e autoridade siguransa sira iha fronteira bele dezeña planu operacional ida ne'ebé integradu tuir tarefa serbisu instituisaun nian.

Nune'e rekursu umanu sei limite iha postu integradu sira iha fronteira hodi difikulta serbisu instituisaun sira nian. Preokupasaun ida mai husi elementu UPF sira katak númeru rekursu umanu sei oituan iha fronteira nune'e labele halo patrullamentu iha liña fronteira tomak. Ho nune'e sidadaun fronteira balu dalaruma aproveita limitasaun hirak ne'e hodi hakat fronteira ilegalmente no negosiu ilegal sira. Maske implementa ona border pass. FM rekomenda presiza fortifika koordinasaun instituisaun relevante sira iha fronteira ne'ebé integra iha postu integradu.

Nune'e mos realiza kooperasaun entre FALINTIL-FDTL no PNTL iha area siguransa maritima nian.⁶ FM nia monitorizasaun durante ne'e la'o diak tebes iha âmbito siguransa marítima nian maibe facilidade la suporta kooperasaun ne'e. Nune'e mos iha kooperasaun ida ne'e FM rekomenda SED no SES presiza estabelese ona infra-estrutura ba Komponente Naval FALINTIL-FDTL no Unidade Polisia Maritima – PNTL iha kosta sul no leste nian. Peska ilegal kontinua na'ok ikan iha tasi maske Timor-Leste nian interese ba tasi ne'e maka'as tebes.

Sei mellora infra-estrutura no ekipamentu sira hanesan manutensaun ba navius Komponente Naval FALINTIL-FDTL nian (navius hitu no LAR rua).⁷ Asuntu manutensaun ba roo sira iha Komponente Naval FALINTIL-FDTL iha tinan hirak liu ba FM alerta tiha ona manutensaun ba roo hirak ne'e sei problematiku hela. Iha ne'ebé Timor-Leste rasik seidauk iha facilidade no ekipamentu atu halo manutensaun. Proposta OJE 2015 mos mosu rubrika seluk ba manutensaun navius Komponente Naval FALINTIL-FDTL nian. FM nia monitorizasaun durante ne'e deskobre katak roo hirak ne'e paradu hela no la halo operasaun tanba seidauk halo manutensaun.

Asuntu seluk kona-bá serbisu Institutu Defeza Nasional (IDN) nian. Iha ne'ebé misaun prinsipal ida dezenvolve pensamentu estratejiku nasional sira liu husi estudu,

⁴ SED-F-FDTL APREZENTA MODELU AUTORIDADE MARITIMA 2020. Disponivel iha: <http://jornal.suara-timor-lorosae.com/sed-f-fdtl-apresenta-modelu-autoridade-maritima-2020/>.

Asesu iha lora 05 Novembru 2014

⁵ Livru 2, OJE 2015. Planu Asaun Anual ba FALINTIL-FDTL. Pajina 135

⁶ Livru 2, OJE 2015. Planu Asaun Anual ba FALINTIL-FDTL. Pajina 135

⁷ Livru 2, OJE 2015. Planu Asaun Anual ba FALINTIL-FDTL. Pajina 136



investigasaun sientifika no debate kona-bá kestaun sira relaciona ho defeza no siguransa nasional. Nune'e mos formasaun no kursu sira ba kadru superior forsa armada no siguransa nian iha area espesifika sira.⁸

Pontu prinsipal seluk ne'ebé FM rekomenda maka IDN presiza promove publikasaun projetu peskiza no investigasaun sientifika. Hodi fornese rekomendasaun estratejiku sira ba Estadu hodi halo desizaun ruma. Iha ne'ebé dinamika sira iha rejiaun no global implika mos ba estabilidade nasional. Portantu FM nia monitorizasaun durante ne'e IDN forma ona tinan 4 to'o agora seidauk produs relatoriu estudu no investigasaun sientifiku ruma iha materia defeza no siguransa nasional nian. Dadus ne'ebé FM asesu iha portal IDN nian atividade prinsipal sira ne'ebé durante ne'e halo maka vizita rai liur, formasaun, seminariu no diskusaun sira.⁹

2. Siguransa Interna no PNTL

a. Kontrolu Migratoriu

Iha tinan 2015 sei dezenvolve kapasidade Instituisaun Servisu Migrasaun nian. Sei implementa efetiva estratejia Servisu Migrasaun nian iha seitor operasaun, fronteira, delegasaun territorial, servisu permanensia no apoiu administrativu. Iha ne'ebé bele kontrolu sirkulasaun (tama no sai) ema, sasan iha postu fronteira (aeroportu, portu no terrestre). FM nia monitorizasaun hare katak kontrolu ba sirkulasaun ba sidadaun estranjeiru sira iha teritoriu nasional sei menus. Iha ne'ebé seidauk serteza número sidadaun estranjeiru hira mak iha Timor-Leste. Nune'e mos sidadaun estranjeiru sira tama no sai. Servisu Migrasaun seidauk estabese baze dadus ida kona-bá iha ne'ebé bele hare katak ema ne'e tama halo saida? Hela iha ne'ebé? Bainhira maka fila?

Iha tinan 2013 relatoriu media nasional fo sai katak Servisu Migrasaun kaptura ema estranjeiru ne'ebe maka hela iha teritoriu nasional ilegalmente ne'ebe uza vistu turista hodi hala'o serbisu, balun vistu mate, balun tama ilegal, hamutuk 790. Husi numeru 790, konsege haruka fila 217, restu seluk kumpri sira nia dever hodi selu multa no número 393 sei prosesu atu hetan vistu traballu. Sira ne'ebé viola vistu barak liu mai husi Indonezia kuaze 600 resin, Xina 74, Filipina 8, husi Nasaun ida ka rua hanesan mai husi Singapura, Myanmar, Vietnam 35 no Srilanka 2. Sira ne'e haruka fila ho aplika abandona voluntariu.¹⁰ Portantu Timor-Leste seidauk iha orsamentu propriu kona-bá deportasaun. FM nia hare ida hanesan dezafiu boot ida ba Timor-Leste iha area kontolu migratoriu nian. Ho ida ne'e motiva ema kontinua viola prosedimentu legais sira migrasaun nian.

⁸ Livru 2, OJE 2015. Planu Asaun Anual ba Institutu Defeza Nasional (IDN). Pajina 139

⁹ Website Institutu Defeza Nasional (IDN): www.idn.tl

¹⁰ Viola Vistu, Imigrasaun Kaer Ema Rai Liur 790. Disponivel iha: <http://suara-timor-lorosae.com/viola-vistu-imigrasaun-kaer-ema-rai-liur-790/>. Asesu iha loron 05 Novembru 2014



To'o iha tinan klaran 2014 relatoriu media sira hato'o katak operasaun Servisu Migrasaun kaer ona sidadaun estranjeiru, ne'ebé sira hetan ema balun uza vistu traballu no sira seluk ho vistu turista. Iha kolaborasaun ho SEFPOPE (Sekretaria Estadu Formasaun Profisionál no Empregu), Polisia Imigrasaun kria ona ekipa ida ne'ebé hala'o iha distritu Lautem, Viqueque, Baucau no Manatuto. Iha kooperasaun ne'e sira konsege kaptura ema estranjeiru 63, ne'ebé mai husi Xina, Filipina, Indonézia, Portugal no Vietnam no prosesa ona tuir lei imigrasaun nian no sira seluk tuir prosesu administrativu. Ema hirak ne'e kria ona kompañia konstrusaun ne'ebé hodi halo serbisu ba Governu no loja sira.¹¹

Sei kontrola no fiskaliza permanensia sidadaun estranjeiru iha teritoriu nasional. Nune'e mos sei kontrola no prevene krime trafikumanu, falsifikasaun dokumentu. Realiza mos fiskalizacao vistu sidadaun estranjeiru sira iha teritoriu nasional.¹² Buat ironiku ida husi monitorizasaun FM deskobre katak falsifikasaun dokumentu dadaun ne'e buras. Iha ne'ebé monu ba sidadaun estranjeiru sira nia liman.

Iha loron 26 Setembru 2014 autoridade siguransa Timor-Leste kaptura Timor ona balu ho sidadaun estranjeiru balu iha Dili ho evidensia sasan sira ne'ebé utiliza hodi produs dokumentu falsu sira hanesan komputador no makina sira seluk. Grupu ne'e halo operasaun desde tinan 2002 hodi produs no falsifika dokumentu ofisial Estadu nian. Lukru husi falsifikasaun dokumentu kada loron grupu ne'e hetan entra US\$ 100.00 to'o US\$ 500.00. Dokumentu ofisial Estadu nian ne'ebé falsifika hanesan sertidaun batismu, sertidaun RDTL, karta kondusaun no kartaun rejistu veikulu nian ka STNK, kartaun inspesaun veikulu nian, diploma eskola nian ka ljasah, sertifikadu kursu nian, kartaun eleitoral no dokumentu ofisial sira seluk.

Forma hirak ne'e mosu ona preokupasaun desde eleisaun jeral tinan 2012. Iha ne'ebé kartaun eleitoral monu ba sidadaun estranjeiru nia liman hamutuk 600. Nune'e mos sidadaun Koreanu seluk hetan passaporte Timor-Leste nian. Autoridade siguransa Indonezia nian kaptura wanhira nia tama iha Indonezia, detekta katak passaporte ne'e falsu. Kazu hanesan sidadaun Indonezia no naran insial ARD, ne'ebé falsifika nia identidade hodi hetan passaporte no eleitoral, sertidaun RDTL, husi suku Motael ho naran insial RMS.¹³

b. Investigasaun Kriminal

¹¹ Polisia Imigrasaun kaer ona ema estranjeiru 63 tanba viola vistu. Disponivel iha: <http://noticias.sapo.tl/tetum/info/artigo/1413487.html>. Asesu iha loron 05 Novembru 2014

¹² Livru 2, OJE 2015. Planu Asaun Anual ba Sekretaria Estadu Siguransa. Pajina 147

¹³ Lakunas Siguransa Timor-Leste: Atraku ba Krime Organizadu Mahein Nia Lian Nú. 87, 30 Setembru 2014. Disponivel iha: http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf. Asesu iha loron 05 fulan Novembru tinan 2014



Iha area investigasaun kriminal nian, sei dezenvolve kapasidade teknika profesional membru PNTL liu husi formasaun interna nian. Iha area espesifika sira hanesan formasaun bázika no avansadu investigasaun ba droga, krime organizadu, lavajem dinhero no trafiku umanu.¹⁴ Formasaun esterna nian maka liu husi bolsa estudo ba ema na'in 10 ho espesialidade Lisensiatura iha area forensik, kriminolojia, patolojia no psikolojia. Nune'e estudo siensia profesionais ida ne'e bele jere serbisu polisia nian ho efisiensia no efikasias.¹⁵

Iha area investigasaun kriminal nian liu-liu krime organizadu. PNTL difisil atu detekta krimi organizadu ne'ebe akontese iha comunidade nia le'et tanba polisia rasik sei menus rekursu iha area ida ne'e nian. Sekretariu Estadu Siguransa Francisco Guterres hato'o katak:

*"Hanesan hau dehan bebeik ona katak PNTL intermus de rekursu iha parte krimi organizadu ne'e sei falta, ne' e Estadu rekonese, governu rekonese, ho limitasaun ne'ebe maka ita iha, ita la'o neneik, ita buka atu hadia nafatin."*¹⁶

Portantu iha area espesifiku sira Servisu Investigasaun Kriminal PNTL sei iha limitasaun oin-oin. No area ida ne'e presiza hasa'e kuiñesementu pesoal investigador sira nian. Portantu krime ohin loraon sai kompleksu no organizadu. Iha ne'ebé presiza duni pesoal investigador sira ne'ebé kualifikadu iha area investigasaun kriminal nian nune'e bele jere serbisu ida ne'e ho eficiente no efikas.

Maibe buat ironiku seluk, iha area investigasaun kriminal nian mosu serbisu dupla entre instituisaun Estadu nian. Iha ne'ebé Timor-Leste pasa tiha ona Dekretu Lei Nú. 15/2014 loraon 14 fulan Maiu Organika Polisia Sientifika Investigasaun Kriminal (PSIK). Hanesan relatoriu ne'ebé FM hasai tiha ona iha fulan Setembru 2014 hare katak serbisu ida ne'e sei desmotiva no kompete malu. Iha ne'ebé kompetensia sira ne'ebé atribui ba PSIK hanesan serbisu ne'ebé durante ne'e Serbisu Investigasaun Kriminal - PNTL halo. Maske iha lei ne'e rasik hatete PSIK sei hare deit ba kazu kompleksu ka organizadu sira. FM nia hare katak investimentu ba area investigasaun kriminal nian sei la konsentradu no aumenta deit despeza Estadu nian tanba instituisaun barak tutela ba

¹⁴ Livru 2, OJE 2015. Planu Asaun Anual ba PNTL. Pajina 152

¹⁵ Livru 2, OJE 2015. Planu Asaun Anual ba PNTL. Pajina 153

¹⁶ Atu Detekta krimi Organizadu, PNTL Menus Rekursu. Disponivel iha: <http://www.thediliweekly.com/news/news/1930-pntl-unarmed-in-the-fight-against-organised-crime>. Asesu iha loraon 05 fulan Novembru tinan 2014.



serbisu ne'ebé hanesan.¹⁷ Tinan ida ne'e PSIK hetan alokasaun orsamentu hamutuk tokon US\$ 1,089.¹⁸

c. Siguransa Fronteira Terestre

Formasaun interna nian, sei halo formasaun espesializada iha area serbisu siguransa no atendementu ordem públiku nian. Nune'e mos formasaun ajente polisia foun sira ba ema na'in 60.¹⁹ Iha tinan 2015 sei halo akuizasaun ba armas lijeiras, pistolas, munisoens no asesorios armamentu nian ba UPF. Nune'e bele iha armamentu ida ne'ebé sifisiente ba serbisu operasionais nian iha area fronteira no atendementu ba situasaun ameasa interna nian.²⁰ Sei halo mos akuizisaun ba radio komunikaun, binókolus, lâmpada, pillas no gravador.²¹

FM nia monitorizasaun alokasaun orsamentu ba atividade sira iha leten, liu-liu ekipamentu ba UPF. Iha tinan klaran 2014 FM hala'o monitorizasaun iha area fronteira husi Mota Ain (Bobonaro) to'o Mota Masin (Covalima) no husi Sakato to'o Citrana (Oecusse). Elementu UPF sira hato'o katak falta radio komunikaun, binókolus no lâmpada. Nune'e mos ekipamentu sensitivu sira barak liu la funsiona. Tanba ne'e ekipamentu sira ne'e sai ejijensia husi membru UPF sira husu Governu prezisa apoiu hodi asegura siguransa iha liña fronteira.

Nune'e mos menus rekursu ema iha fronteira, iha ne'ebé kada postu menus husi ema na'in 10. Iha momentu hanesan kolokasaun postu UPF ho distansia ne'ebé dook ba malu entre 25 kilometru. Situasaun hirak ne'e difkulta patrullamentu UPF nian. Ho ida ne'e atividade ilegal no hakat ilegalmente husi comunidade balu kontinua akontese iha fronteira. Situasaun hirak ne'e durante ne'e sai preokupasaun sosiedade tomak nian no kestiona serbisu sira iha fronteira. Tanba ne'e FM nia rekomendasaun prezisa aumenta postu UPF iha fronteira hodi preense area sira ne'ebé luan no durante ne'e lakonsege kobre iha patrullamentu UPF nian.

d. Siguransa Maritima

Iha tinan 2015 sei halo konstrusaun postu foun 8 ba Unidade Polisia Maritima (UPM) iha iha Com, Lore, Batugade, Oecusse, Suai Loro, Betano, Beaço no Carabela. Nune'e mos kontrusaun postu permanente, bareiras no pisina iha Sional, Dili. Sei halo mos

¹⁷ Polítika Krisaun Polisia Sientífika Investigasaun Kriminál (PSIK) Parseiru no Ameasa ba Instituisaun Siguransa. Disponivel iha: http://www.fundasaunmahein.org/wp-content/uploads/2014/09/MNL_Nu.86_25092014_PSIK.pdf. Asesu iha loron 05 fulan Novembru 2014

¹⁸ Livru 4A, OJE 2015. Rubrika Orsamentais ba Ministériu Justisa. Pajina 287

¹⁹ Livru 2, OJE 2015. Planu Asaun Anual ba PNTL. Pajina 153

²⁰ Livru 2, OJE 2015. Planu Asaun Anual ba PNTL. Pajina 155

²¹ Livru 2, OJE 2015. Planu Asaun Anual ba PNTL. Pajina 156



akuizisaun ba viaturas, jetsky no boy (marka espesial) UPM hodi halo patrullamentu no proteze area kosteira sira Timor-Leste nian.²² Formasaun esterna no espesifika nian sei fo bolsa estudu ba ema na'in 40 ho espesialidade Lisensiatuura area kapitaun roo nian, makenista, eletresidade, navegasaun, *brigadier harwal* roo nian, no treinamenu Inspektor idik, brigadier idik.²³

Iha alokasaun orsamentu ba atividade sira ne'ebé sei realiza iha tinan 2015 FM nia hare katak difikuldade hirak ne'e maka durante ne'e infrenta. Portantu ba dadaun ne'e postu iha deit area konteira parte norte nian hanesan Postu Polisia ba UPM kompostu husi postu Batugade, postu Atabae, postu Atauru, postu Beloi, postaun Portu Dlli, Sional Dili no Com Lospalos. Nune'e formasaun sira iha area espesifika nian hodi eleva kuiñesementu memnru UPM nian. iha area sira hanesan navegasaun, makenista no operasaun nian no area espesifiku sira seluk, ne'e sorin ida.

Iha sorin seluk, atu kompleta postu sira ne'ebé sei monta iha tinan 2015 presiza aumenta rekursu ema. Ba dadaun ne'e membru UPM hamutuk na'in 120 ne'ebé fahe ba area tolu mak hanesan serbisu iha postu, serbisu iha roo no serbisu iha kuartel unidade nian. Iha ne'ebé desde UPM hari iha tinan 2001 husi Polisia Nasoens Unidas ho membru PNTL hamutuk na'in 8, iha tinan 2010 membru UPM aumeta ba na'in 44, to'o iha tinan 2014 hamutuk na'in 120.²⁴

e. Siguransa Komunitariu

Tuir planu anual PNTL nian iha Livru OJE 2015 ba polisiamentu komunitariu. Iha tinan 2015 sei dezenvolve kapasidade teknika no profesional ba membru PNTL sira liu husi formasaun interna nian. Iha atividade polisiamentu komunitaria nian sei kontinua formasaun ba Oficial Polisia Suku (OPS) sira iha suku iha area polisiamentu komunitaria. Nune'e mos treinamentu bázika iha polisiamentu komunitariu nian. Formasaun teknika komunikasaun ba OPS iha suku. Treinamentu ba juventude siguransa voluntariu suku nian iha distritu 13. Nune'e rezultadu ne'ebé sei hetan maka membru polisia iha ona kuiñesementu profundu ba area interakasaun sosial no psikolojika sosial. Formasaun ba juventude siguransa voluntariu sira sei hetan mos kuiñesementu ida adekuadu hodi apoiu polisia iha area siguransa no prevensaun krime nian.²⁵

²² Livru 2, OJE 2015. Planu Asaun Anual ba PNTL. Pajina 155

²³ Livru 2, OJE 2015. Planu Asaun Anual ba PNTL. Pajina 153

²⁴ PM XANANA INAGURA POSTU POLISIA MARITIMA, PRESIJA KONTRIBUSAUN EMPREZARIU. Disponivel iha: <http://jornal.suara-timor-lorosae.com/pm-xanana-inagura-postu-polisia-maritima-presija-kontribusaun-emprezariu/>. Asesu iha loron 05 fulan Novembru tinan 2014.

²⁵ Livru 2, OJE 2015. Planu Asaun Anual ba PNTL. Pajina 152.



Iha tinan 2015 dezenvolvimentu Infra-estrutura ba PNTL liu husi konstrusaun, reabilitasaun moradias, estrada no instalasaun seluk nian. Instituisaun PNTL sei halo konstrusaun postu polisia 38 iha distritu 13. Portantu buat ne'ebé PNTL hakarak atinji iha tinan 2015 nian laran maka polisia nia prezensa iha area rurais hodi halo atendementu no protesasaun ba comunidade.²⁶

Iha tinan 2015 sei mellora serbisu administrasaun no operasaun liu husi akuizisaun ba ekipamentu siguransa no motorizadas ba komandu distrital 13 iha teritoriu tomak. Nune'e rezultadu ne'ebé sei atinji maka polisia iha ona meius transporte ne'ebé naton hodi apoiu ba serbisu operasaun nian.²⁷ Maibe la klaru motorizadas hirak ne'ebé aloka ba komandu distrital sira, ba polisia komunitariu ka seksaun seluk nian? FM nia rekomendasaun viaturas hirak ne'e aloka ba serbisu polisiamentu komunitariu. Portantu FM nia monitorizasaun OPS sira iha suku difikuldade boot liu maka transporte. Ezemplu, OPS ida dalaruma halo serbisu iha suku rua ka tolu maibe hela iha suku seluk (suku ne'ebé la hanesan) maibe transporte la iha. Dalaruma OPS utiliza deit transporte públiku no motorizada privadu maka ba serbisu. Portantu hela fatin ba OPS sira iha suku seidak iha.

Iha tinan 2015 mos sei halo vizibilidade serbisu polisiamentu liu husi patrullamentu ho kareta, motorizadas no la'o ain. Nune'e sei involve comunidade iha serbisu polisiamentu nian, responde ho professionalism iha asidenti no insidenti sira. Iha ne'ebé sei koloka OPS hanesan ofisila ligasaun iha suku. Sei halo enkontru komunitairu ho grupu lideransa komunitariu sira, negosiante sira, juventude, ONG sira no Igreja. Buat hirak ne'e hodi kostuma polisia sira vizita iha eskola, suku no aldeia. Nune'e mos sei rekolla dadus demografiku liu husi polisia ne'ebé sei vizita husi uma ba uma. Ho nune'e rezultadu ne'ebé sei hetan maka kria amizade entre polisia ho comunidade no konfiansa comunidade nian ba polisia no comunidade sai hanesan liman-ain, matan no tilun polisia nian. Prevene krime, asidenti no insidenti sira iha comunidade.²⁸

FM nia hare política no alokasaun ida ne'e responde dadauk ona ba Planu Estratejiku PNTL nian iha area polisiamentu komunitariu nian. Maske seidak responde hotu ba nesiedade polisiamentu komunitariu nian iha terenu hanesan hela fatin. FM fiar katak alokasaun ida ne'e Parlamentu Nasiona sei aprova. Portantu Parlamentu Nasiona rasik iha nia fiskalizasaun hatene kondisaun hirak ne'e. Sai hanesan eijjensia ida husi Parlamentu Nasiona iha ne'ebé husu Governu presiza tau atensaun ba kondisaun polisia nian. Nune'e mos eijjensia públiku nian katak polisia tenki serbisu ho profesional. Portantu atu hetan serbisu ida ne'ebé profesional presiza mos kondisaun ba polisia sira.

²⁶ Livru 2, OJE 2015. Planu Asaun Anual ba PNTL. Pajina 154.

²⁷ Livru 2, OJE 2015. Planu Asaun Anual ba PNTL. Pajina 155.

²⁸ Livru 2 OJE 2015. Planu Asaun Anual ba PNTL. Pajina 156.



Ejjensia komidade nian kona-bá prezensa polisia iha sira nia leet, hetan atensaun maka'as husi Prezidenti Repúblika no Premeiru Ministru husu atu koloka OPS sira iha suku hotu-hotu distritu 13. Nune'e tuir orientasaun Komandu Jeral PNTL nian ba Komandu Distrial sira hodi koloka OPS sira ba suku hotu-hotu iha sira nia distritu. Iha ne'ebé tarde to'o tinan klaran 2015, OPS tenki iha ona suku 442.²⁹

Iha tinan rohan 2013 FM hasai ona relatoriu dahuluk ida kona-bá iniciativa baze kona-bá pratika polisiamentu komunitariu.³⁰ Iniciativa hirak ne'e ho tulun parseiru dezvoltimentu sira ka doador,³¹ forma Konsellu Polisiamentu Komunitariu (KPK) no Siguransa Voluntariu iha suku. KPK no Siguransa Voluntariu forma ona iha distritu 8 hanesan Aileu, Ainaro, Baucau, Bobonaro, Dili, Liquiça, Manatuto no Viqueque inklui distritu 3 hanesan Covalima, Ermera no Manufahi dadaun ne'e iha faze sosializasaun ba implementasaun. Kada distritu implementa iha suku 10.³² Ba dadaun ne'e KPK no Siguransa Voluntariu funsiona iha suku 74 iha distritu 8.³³

KPK no Siguransa Voluntariu nu'udar modelu polisiamentu komunitariu ida ne'ebé involve kamada sosiais hotu iha nivel komidade. KPK no Siguransa Voluntariu nia kompozisaun mai husi OPS, xefe suku no membru konsellu suku tomak, lia na'in, veteranus, representante negosiante sira, parte edukasaun no saúde nian, Igreja no ajente relevante seluk iha suku.³⁴

Kolokasaun OPS, harii KPK no Siguransa Voluntariu iha suku nu'udar mos asaun konkritu ida hodi hatan ba Planu Estratejiku PNTL nian. Iha ne'ebé PNTL adopta doutrina VIP, signifika vizibilidade polisia nian iha komidade nian komesa iha ona.

Saida maka OPS, KPK no Siguransa Voluntariu sira halo? Atividade prinsipal husi modelu polisiamentu ida ne'e maka prevensaun konflitu no krime. Faze dahuluk liu, membru KPK no Siguransa Voluntariu identifika problema siguransa iha sira nia suku.

²⁹ Diskursu Xefe Departamentu Polisiamentu Komunitaria Nasional, Superintendente Asistente Boavida Ribeiro hato'o iha seminar nasional polisiamentu Komunitaria iha Dili fulan Setembru tinan 2014.

³⁰ Iniciativa Husi Baze Kona-bá Pratika Polisiamentu Komunitaria: Iniciativa Komandu Distrial Bobonaro, Aileu, Liquisa no Unidade Polisia Marítima. Disponivel iha: http://www.fundasaunmahein.org/wp-content/uploads/2013/11/MNH_Nu.05_15112013_Polisias-Komunitariapdf.pdf. Asesu iha loron 24 fulan Outobru tinan 2014.

³¹ Doador sira ne'ebé durante ne'e fo tulun ba polisiamentu komunitaria hanesan Governu Nova Zelandia liu husi Polisia Nova Zelandia nian ho programa Timor-Leste Community Policing Programe (TLCPP), The Asia Foundation (TAF) liu husi programa HAKOHAK no Governu Japaun liu husi JICA.

³² Diskursu Xefe Departamentu Polisiamentu Komunitaria Nasional, Superintendente Asistente Boavida Ribeiro hato'o iha seminar nasional polisiamentu Komunitaria iha Dili fulan Setembru tinan 2014.

³³ Departamentu Polisiamentu Komunitariu Nasional tinan 2014.

³⁴ Ribeiro, Boavida Superintendente Asistente (2014). Xefe Departamentu Polisiamentu Komunitariu Nasional. Entrevista pesoal



Husi identifikasaun ida ne'e sira halo analiza hodi hare katak problema ida ne'ebé maka prioridade liu no iha tendensia ka potencia bele mosu konflitu iha sira nia suku. Hafoin ida ne'e sira diside hamutuk hodi buka solusaun ba problema ne'ebé sira identifikadu ona. Metodu ne'ebé sira utiliza hodi solusiona konflitu maka liu husi mediasaun no justisa tradisional ho lia na'in sira ne'ebé iha sira nia suku. Ezemplu, dadaun ne'e kazu disputa rai maka'as iha teritoriu tomak no iha tinan hirak ikus número krime husi kazu ida ne'e nian kontinua aumenta. OPS, KPK no Siguransa Voluntairu sira iha suku nia atividade prinsipal ida nu'udar mediador halo mediasaun ba parte sira ne'ebé involve iha kazu refere. Maibe sira la halo intervensaun ba kazu krime sira no sira kanaliza ba polisia liu husi OPS ne'ebé koloka iha suku hanesan violensia domestika.

OPS, membru KPK no Siguransa Voluntariu sira mos halo atividade vizita husi uma ba uma no eskola iha sira nia suku hodi hato'o ba estudante no membru familia sira kona-bá informasaun siguransa. Nune'e OPS, membru KPK no Siguransa Voluntariu sira involve mos atividade husi parte relevante sira husi Governu nian hanesan sosializasaun lei violensia domestika. Membru husi KPK no Siguransa Voluntairu sira ne'e hotu serbisu ho voluntariu.

FM nia monitorizasaun iha distritu hirak ne'ebé implementa ona KPK no Siguransa Voluntairu hato'o katak konflitu no krime hetan redusaun ida signifikante tebes. Iha ne'ebé antes ne'e número krime aas iha sira nia distritu no suku. Ne'e atu hatete katak comunidade involve direta foti desizaun ba sira nia problema no harii paz iha sira nia suku no aldeia. Asaun hirak ne'e responde dadauk ona ba Planu Estratejiku PNTL 2014 – 2018 no doutrina VIP nian kona-bá involvimentu comunidade nian iha seitor siguransa. Komunitade sai hanesan ajente prinsipal ida iha seitor siguransa nian no sai na'in ba obra ne'ebé harii iha sira nia suku.

Maibe susesu hirak ne'e seidauk hetan atensaun masimu husi Governu. Partikularmente alokasaun orsamentu ba polisiamentu komunitariu. Portantu atividade polisiamentu komunitaria iha distritu no suku sei iha limitasaun oin-oin hanesan facilidade, ekipamentu no menus formasaun ba pesoal polisia komunitaria sira.³⁵

Iha tinan klaran 2014 Komandu Jeral PNTL no organizasaun doador sira konvoka sorumutu ida iha Dili ko'alia kona-bá serbisu polisiamentu komunitariu. Iha sorumutu ida ne'e ekipa avaliasaun ba programa doador sira nian ne'ebé durante ne'e apoiu ba polisia komunitariu. Aprezentasaun relatoriu preliminaru ida ne'ebé apresenta husi ekipa avaliasaun hato'o katak polisiamentu komunitariu ne'ebé koloka ona iha suku sira sei infrenta difikuldade ba kondisaun báziku sira. Hanesan facilidade, ekipamentu no

³⁵ Inisiativa Husi Baze Kona-bá Pratika Polisiamentu Komunitariu: Inisiativa Komandu Distrital Bobonaro, Aileu, Liquisa no Unidade Polisia Marítima. Disponivel iha: http://www.fundasaunmahein.org/wp-content/uploads/2013/11/MNH_Nu.05_15112013_Polisia-Komunitariapdf.pdf. Asesu iha loron 24 fulan Outobru tinan 2014.



presiza formasaun ba pesoal polisia komunitariu sira hodi eleva sira nia kuiñesementu iha serbisu ne'ebé sira tutela ba.³⁶

Nune'e mos FM nia monitorizasaun ba serbisu polisiamentu komunitariu nian liu husi atividade vizita rejional kona-bá sorumutu polisia no lider komunitaria sira ba distritu lima dahuluk tinan 2013-2014 hanesan Aileu, Covalima, Liquiça, Oe-Cusse no Viqueque. Hotu-hotu hato'o preokupasaun hanesan kona-bá difikuldade ne'ebé sira infrenta hanesan transporte, komunikasaun, hela fatin, menus kuiñesementu ba polisiamentu komunitariu nian.

Difikuldade hirak ne'e iha proposta OJE ba tinan 2015 nian Governu hahu ona tau atensaun ba polisiamentu komunitariu. Nu'udar deskreve iha planu asaun anual OJE tinan 2015 nian, partikularmente ba Instituisaun PNTL. Iha ne'ebé toka ba formasaun rekursu umanu, atividade polisiamentu komunitariu, infra-estrutura, facilidade no ekipamentu sira.³⁷ Ida ne'e nu'udar pasu prinsipal ida hodi konkretiza filozofia PNTL nian. Nune'e mos Planu Estratejiku PNTL nian tinan 2014 - 2018 ne'ebé difine modelu polisiamentu hako'ak filozofia polisiamentu komuntariu nia liu husi adopta doutrina VIP (Vizibilidade, Involvimentu no Profesionalismu).

Portantu aloksaun orsamentu hodi hadi'a serbisu polisiamentu komunitariu nian nu'udar parte ida hodi eleva profesionalismu polisia nian. Iha ne'ebé durante ne'e públiku no Parlamentu Nasional rasik kestiona serbisu polisiamentu nian iha terenu.


Servisu Nasional Intelijensia (SNI)

Proposta OJE 2015 ba SNI hamutuk tokon US\$ 2,288 ne'ebé tutela ba Gabinete Premiru Ministru. Iha ne'ebé aloksaun orsamentu ba SNI tuir rubrika despeza sira iha grafika kraik ne'e.

³⁶ Sumariu relatoriu preliminaru monitorizasaun no avaliasaun ba Timor-Leste Community Policing Programme – TLCPP no Hametin Kooperasaun Hamutuk Polisia ho Komunitade – HAKOHAK husi ekipa avaliasaun kompostu husi Gordon Peake, Bu Wilson no João Almeida. Fundasaun Mahein sai mos partisipante iha diskusaun relatoriu preliminaru ne'e. Apresenasaun relatoriu preliminaru ne'e hala'o iha loron 2 Setembru 2014 iha Salaun World Vision, Bidau – Dili.

³⁷ Livru 2, OJE 2015. Planu Asaun Anual ba PNTL.

Grafika despeza sira tuir kategoria orsamentu ba SNI (\$'000)



Fontes: Livru 4A Proposta OJE 2015

Alokasaun hirak ne'e sei apoiu ba atividade SNI nian hodi aseguira sistema informasaun Estadu nian. Iha ne'ebé reforsa liña koordinasaun entre SNI ho ministériu relevante sira no instituisaun seluk hodi fortifika no partilla informasaun sira. Nune'e mos sei kria komisaun teknika ne'ebé prezide husi SNI hodi elabora planu asaun integradu ida entre liña ministériu sira. Nune'e mos sei realiza reuniaun trimestrais ho liña ministeriais relevante sira hodi forma no avalia tipu ameasa sira.

Iha tinan 2015 SNI sei reforsa mos serbisu informasaun nivel internasional, nasional no rejional. Iha ne'ebé sei estabese subsentru koordinasaun serbisu informasaun nivel rejional iha Oecusse, Baucau no Suai.³⁸ Sei halo mos kursu kona-bá peskiza, análise no elabora informasaun sira iha rai laran no rai liur. Nune'e mos kontinua realiza formasaun no kursu iha area terorismu, kontra terorismu, droga, trafikumanu, imigrasaun ilegal, brankeamentu kapital, informatika no telekomunikasaun.³⁹

Iha tinan 2015 sei kontinua dezenvolve kooperasaun bilaterais no multilaterais ho Nasaun sira Azia, CPLP (Portugal no Brazil), Mediu Oriente, Australia no Estados Unidos Amerika. Iha ne'ebé kontinua implementa Memorandu Entendementu ho ajensia informasaun sira liu husi embaxada akreditas sira hodi kontinua fahe informasaun.⁴⁰

FM nia leitura alokasaun orsamentu ba atividade sira SNI nian iha tinan 2015 relevante tebes ho situasaun sira ne'ebé dadaun ne'e Timor-Leste hasoru. Iha ne'ebé formasaun sira hodi eleva kuiñesementu membru SNI sira nian. Nune'e mos dezenvolve koordinasaun no koperasaun sira iha rai laran, bilaterais no multilaterais.

³⁸ Livru – 2 OJE 2015. Planu Asaun Anual ba SNI. Pajina 40.

³⁹ Livru - 2, OJE 2015. Planu Asaun Anual ba SNI. Pajina 41.

⁴⁰ Livru - 2, OJE 2015. Planu Asaun Anual ba SNI. Pajina 41.



Portantu ameasa sira ne'ebé dadaun ne'e Timor-Leste hasoru hanesan terorismu global, krime organizadu, droga, trafiku umanu, lavajen dinhero, mafia, imigrasaun ilegal, brankeamentu kapital no falsifikasaun dokumentu. Forma hirak ne'e FM nia deskonfia nia rede hahu fortifika no halo operasaun iha Timor-Leste.

Hanesan notisia sira dadaun ne'e namanas hela iha media nasional hotu-hotu kona-bá trafiku droga iha Timor-Leste. Iha ne'ebé utiliza Timor-Leste hanesan knuk hodi halo importasaun droga husi Azia Sentral no Afrika hodi distribui ba rai viziñu Indonezia no iha Timor-Leste rasik.

Potensia seluk dadaun falsifikasaun dokumentu. Iha ne'ebé falsifika dokumentu oficial sira Estadu nian no dokumentu hirak ne'e monu ona ba sidadaun estranjeiru balu nia liman. Ninia operasaun iha Timor-Leste liu husi serbisu sira imprime dokumentu oficial sira husi empreza privadu balu ne'ebé durante ne'e hala'o nia atividade. Hanesan *rental* komputador no empreza printing balu. Iha ne'ebé FM deskobre katak iha balu hetan lisensa negosiu nian no balu halo operasaun ho ilegal.⁴¹ Kazu ne'ebé FM hetan katak dokumentu oficial sira hanesan kartaun eleitoral no sertidaun RDTL produs hotu ona no prontu atu distribui. Iha ne'ebé dokumentu sira ne'ebé FM hetan identidade sira ne'ebé iha dokumentu hirak ne'e identifika katak sidadaun balu mai husi rai viziñu Indonezia no Xineza balu.⁴²

FM nian tauk, ida ne'e fo fatin ba grupu krime organizadu sira hodi aproveita no utiliza dokumentu falsu sira ne'e hodi hasubar-an iha Timor-Leste. Nune'e mos hodi organiza atividade krime organizadu nian.

Portantu relasiona ho movimentu grupu kriminozu sira iha Azia no rai viziñu sira hanesan Indonezia no Australia. Iha fulan ida liu ba autoridade siguransa Australia nian tiru mate joven na'in ida ne'ebé deskonfia membru ISIS nian.⁴³ Nune'e mos movimentu membru ISIS iha rai belun Indonezia nian⁴⁴ ne'ebé la dook husi Timor-Leste no haketak deit ho fronteira terestre. Iha ne'ebé fronteira Timor-Leste no Indonezia hanesan sosiedade tomak preokupa katak buras ho atividade ilegal.

Ho nune'e iha ka lae insidenti sira leten ne'e, influencia ba política siguransa Timor-Leste nian? FM alerta katak Governu tenki konvoka diskusaun ka analiza sira kona-bá potencia implikasaun ba Timor-Leste. Portantu ho vulnerabilidade situasaun siguransa

⁴¹ Relatoriu autoridade serbisu informasaun Estadu nian kona-bá operasaun hasoru grupu sira ne'ebé falsifika dokumentu oficial Estadu nian. Kaptura iha Dili, loron 26 Setembru 2014.

⁴² Relatoriu autoridade serbisu informasaun Estadu nian kona-bá operasaun hasoru grupu sira ne'ebé falsifika dokumentu oficial Estadu nian. Kaptura iha Dili, loron 26 Setembru 2014.

⁴³ Tersangka Militan ISIS Ditembak Mati di Australia. Disponivel iha: <http://www.dw.de/tersangka-militan-isis-ditembak-mati-di-australia/a-17949404>. FM asesu iha loron 29 Setembru 2014.

⁴⁴ Polisi cegah penyebaran propaganda ISIS. Disponivel iha: http://www.bbc.co.uk/indonesia/berita_indonesia/2014/09/140919_isis. FM asesu iha loron 29 Setembru 2014.



grupu hirak ne'e bele aproveita. Nune'e mos bele mai husi terorista migrante sira. Iha ne'ebé bele buka meius no aproveita lakunas ne'ebé iha estrutura sosiedade nian ho siguransa entre Nasaun. Ida ne'e biban no faktus forte organizaun sira hanesan ISIS no simpatizante sira dezenvolve sira nia-an iha nasaun viziñu sira ne'ebé besik liu Timor-Leste. Inklui Indonezia, Malazia ho Australia. Tanba ida ne'e maka lojika duni atu halo forte lala'ok implementasaun lei nian iha nasaun viziñu sira atu funu hasoru terorista sira.⁴⁵

Timor-Leste relativamente fraku kona-bá lala'ok siguransa nian iha fronteira maritima no terestre bele sai biban boot atu sai terjetu hodi atrai ba terorista sira atu bele tama-sai facil. Nune'e mos bele hases-an husi kontrolu autoridade siguransa nian. Senariu sira hanesan ne'e inkuantu la detekta didiak bele utiliza Timor-Leste hanesan fatin halai sees ka subar-an.⁴⁶

Rekomendasaun

1. Komisaun B Parlamentu Nasional

- a. Parlamentu Nasional Komisaun B presiza apoiu ba polítika no alokasaun orsamentu ba serbisu area esensial sira hanesan siguransa fronteira terestre, maritima, investigasaun kriminal, siguransa komunitariu no intelijensia nian iha diskusaun orsamentu ne'ebé sei mai.
- b. Rekomenda ba Komisaun B Parlamentu Nasional atu halo fiskalizaun ba ezekusaun OJE hahu husi planeamentu, prosesu aprovizionamentu no implementasaun ka realizaun projetu sira. Portantu Komisaun B Parlamentu Nasional hetan alokasaun orsamentu ba viajem lokal ho montante ida boot. Iha ne'ebé proposta OJE 2015 nian Komisaun B Parlamentu Nasional hetan alokasaun ba viajem lokal hamutuk \$ 73 husi total \$ 117 ba kategoria Bens no Serbisu nian.

2. Governu

- a. Ba diresaun hotu-hotu iha MDS atu estabelese (iha) uluk kalendariu aprovizionamentu no kalendariu kompras (akizisaun) ba projetu no kontratu hotu

⁴⁵ Lakunas Siguransa Timor-Leste: Atraku ba Krime Organizado Mahein Nia Lian Nú. 87, 30 Setembru 2014. Disponivel iha: http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf. Asesu iha loron 05 fulan Novembru tinan 2014.

⁴⁶ Lakunas Siguransa Timor-Leste: Atraku ba Krime Organizado Mahein Nia Lian Nú. 87, 30 Setembru 2014. Disponivel iha: http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf. Asesu iha loron 05 fulan Novembru tinan 2014.



durante tinan ida, hodi evita projetu emerjensia ne'ebé dudu ho ajudikasaun direta.

- b. Ba MDS atu hatuir (obdese) ba lei aprovizionamentu no matadalan ba pratika diak iha prosesu ezekusaun OJE 2015.



Bibliografia

- Atu Detekta krimi Organizadu, PNTL Menus Rekursu. Disponivel iha: <http://www.thediliweekly.com/news/news/1930-pntl-unarmed-in-the-fight-against-organised-crime>. Asesu iha loron 05 fulan Novembru tinan 2014.
- Diskursu Xefe Departamentu Polisiamentu Komunitaria Nasional, Superintendente Asistente Boavida Ribeiro hato'o iha seminar nasional polisiamentu Komunitariu iha Dili fulan Setembru tinan 2014.
- Inisiativa Husi Baze Kona-bá Pratika Polisiamentu Komunitariu: Inisiativa Komandu Distrital Bobonaro, Aileu, Liquisa no Unidade Polisia Marítima. Disponivel iha: http://www.fundasaunmahein.org/wp-content/uploads/2013/11/MNH_Nu.05_15112013_Polisia-Komunitariapdf.pdf. Asesu iha loron 24 fulan Outobru tinan 2014.
- Lakunas Siguransa Timor-Leste: Atraku ba Krime Organizadu Mahein Nia Lian Nú. 87, 30 Setembru 2014. Disponivel iha: http://www.fundasaunmahein.org/wp-content/uploads/2014/09/MNL_Nu.-87_3009201_Operasaun-Krime-pdf.pdf. Asesu iha loron 05 fulan Novembru tinan 2014
- Orsamentu Jeral Estadu (OJE) tinan 2015. Livru - 2, Planu Asaun Anual.
- Orsamentu Jeral Estadu (OJE) tinan 2015. Livru 4 - A, Rubrika Orsamentu.
- Parlamentu Nasional Komisaun B - Negosiu Estranjeiru, Defeza no Siguransa Nasional. Kalendaru audensia debate kona-bá proposta Lei Orsamentu Jeral Estadu ba tinan 2015.
- PM XANANA INAGURA POSTU POLISIA MARITIMA, PRESIJA KONTRIBUSAUN EMPREZARIU. Disponivel iha: <http://jornal.suara-timor-lorosae.com/pm-xanana-inagura-postu-polisia-maritima-presija-kontribusaun-emprezariu/>. Asesu iha loron 05 fulan Novembru tinan 2014.
- Polisia Imigrasaun kaer ona ema estranjeiru 63 tanba viola vistu. Disponivel iha: <http://noticias.sapo.tl/tetum/info/artigo/1413487.html>. Asesu iha loron 05 Novembru 2014
- SED-F-FDTL APREZENTA MODELU AUTORIDADE MARITIMA 2020. Disponivel iha: <http://jornal.suara-timor-lorosae.com/sed-f-fdtl-apresenta-modelu-autoridade-maritima-2020/>. Asesu iha loron 05 Novembru 2014
- Viola Vistu, Imigrasaun Kaer Ema Rai Liur 790. Disponivel iha: <http://suara-timor-lorosae.com/viola-vistu-imigrasaun-kaer-ema-rai-liur-790/>. Asesu iha loron 05 Novembru 2014.